

25/02/2003

Asia yakin Malaysia mampu terajui NAM

ASIA yakin Malaysia mampu menerajui NAM ke arah masa depan yang stabil dan selamat dalam tempoh tiga tahun kepemimpinan Kuala Lumpur.

Amir Kuwait, Sheikh Sabah Al-Ahmad Al-Jaber Al-Sabah, berkata keyakinan itu berdasarkan keupayaan kepemimpinan Perdana Menteri, Datuk Seri Dr Mahathir Mohamad.

"Kami mempunyai keyakinan penuh terhadap keupayaan luar biasa dan pengalaman luas anda yang meletakkan anda sebagai antara pemimpin penting di arena antarabangsa dengan mencapai kejayaan, kemajuan dan kemakmuran untuk Malaysia dalam keadaan sukar," katanya.

Berucap mewakili Asia pada perasmian sidang kemuncak NAM, beliau berkata dalam keadaan dunia yang tidak menentu dan penuh cabaran, Asia berazam melakukan yang terbaik bagi mengatasi cabaran itu.

Sehubungan itu, beliau mengajak semua negara anggota bersatu padu serta memperbaharui azam bagi memanfaatkan pengajaran dan pengalaman lalu.

"Kunci kepada pencapaian matlamat itu adalah perpaduan dan menghormati matlamat asas pergerakan," katanya.

Beliau juga menyatakan ikrar Asia untuk bekerjasama dengan kepemimpinan baru NAM bagi mencapai matlamat pergerakan serta menjayakan keputusan sidang kemuncak kali ini.